

**SEDMA KONFERENCIJA DIREKTORA NACIONALNIH BIBLIOTEKA JUGOISTOČNE
EUROPE I RADIONICA NA TEMU DIGITALIZACIJE,
4-5. oktobar 2018. godine, Narodna biblioteka Srbije**
**SEVENTH CONFERENCE OF THE DIRECTORS OF NATIONAL LIBRARIES OF
SOUTHEAST EUROPE AND WORKSHOP ON DIGITIZATION,
4-5. October 2018, The National Library of Serbia**

Anja Mastilović, dipl. komp. i dipl. bib.

Nacionalna i univerzitetska biblioteka Bosne i Hercegovine, Sarajevo, BiH
anja@nub.ba

U Narodnoj biblioteci Srbije, 4. i 5. oktobra 2018. godine, održana je Sedma konferencija direktora nacionalnih biblioteka Jugoistočne Europe. SEENL je osnovan po ugledu na umrežavanje nacionalnih biblioteka Europe, uz pomoć Konferencije direktora nacionalnih biblioteka Europe.

Svrha ove konferencije je povezivanje nacionalnih biblioteka u jugoistočnoj Europi u snažnu mrežu koja čini kulturnu baštinu potpunom, dostupnom i zaštićenom.

Glavna tema Sedme konferencije bila je proces i stanje digitalizacije u nacionalnim bibliotekama Jugoistočne Europe te problemi u čuvanju i zaštiti digitalnih objekata. Pažnja se usmjerila i na probleme smještanja, čuvanja i zaštite fizičke građe.

Okupljeni učesnici bili su direktori biblioteka iz Albanije, Bosne i Hercegovine, Bugarske, Crne Gore, Grčke, Hrvatske, Makedonije, Slovenije i Srbije te njihovi saradnici, koji se u svojim nacionalnim bibliotekama bave digitalizacijom.

Saradnici su uz pomoć prezentacija predstavili iskustva svojih biblioteka u oblasti najnovijih trendova u razvoju digitalnih kolekcija, kao i digitalnih alata za upravljanje podacima. Predstavljani su aktuelni projekti, od kojih su mnogi zajednički. U skladu sa zajedničkim projektima, istaknut je i značaj umrežavanja, dijeljenja resursa, kao i planskog i strateškog unaprjeđivanja oblasti digitalizacije kroz nastavak saradnje u budućim projektima.

5. oktobra direktori biblioteka imali su radni sastanak u arheološkom parku Viminacijum, dok su saradnici bili prisutni na predavanju gosta iz Slovačke. Predavač Strnisko Juraj prezentovao je praksu i iskustva slovačkog Centralnog arhiva podataka pri Univerzitetskoj biblioteci u Bratislavi. U svom predavanju govorio je o digitalnom očuvanju i trajnom skladištenju digitalnih objekata. Centralni arhiv podataka radio je na projektu dugoročne zaštite slovačkog kulturnog naslijeđa. Kapacitet pohrane digitalizovane građe je 25 petabyta, ona je smještena na tri udaljene lokacije te su za svaki digitalizovani materijal/objekat snimane tri digitalne kopije na kojima je građa dostupna u različitim formatima.

Uz konferenciju je održana i dvodnevna radionica, koju je podržala Konferencija direktora nacionalnih biblioteka Europe kroz grant Erlanda Koldinga Nilsena, dugogodišnjeg direktora Kraljevske biblioteke u Danskoj. Grant se dodjeljuje svake godine jednoj biblioteci članici za podsticanje međunarodne saradnje i jačanje veza između nacionalnih biblioteka Europe.

Ovom prilikom su potpisana i dva važna memoranduma o saradnji između Narodne biblioteke Srbije i Narodne i univerzitetske biblioteke "Sv. Kliment Ohridski" iz Skoplja, te između Narodne biblioteke Srbije i Nacionalne biblioteke Bugarske.

Na Konferenciji je predstavljena i web stranica SEENL-a (South East European National Libraries) na kojoj će se nalaziti sve informacije vezane za rad biblioteka Jugoistočne Europe.